

# Semadeni batta per il rapport da linguas minoritaras

■ **(anr/vi) Silva Semadeni insista sin in rapport davart la situaziun dal rumantsch e dal talian. Il favrer ha la cussegliera naziunala survegnì ina risposta negativa sin ses postulat «Allegra, il rumantsch ed il talian duain viver!»** Il cussegl federal propoia da refusar il postulat che pretenda in rapport davart la situaziun dal rumantsch e dal talian en Svizra. Ventg onns suenter che l'artigel da linguatgs è vegnì francà en la costituziun less la politichera grischuna savair co ch'i stat vairamain cun la promoziun da las linguas e tge effect che quella fa.

In rapport na fetschia betg da basegn damai che la confederaziun rapportia regularmain en il rom dal monitoring da la Charta europeica da las linguas regiuna-

las u minoritaras, scriva il cussegl federal en sia resposta. Quest rapport tractia la situaziun da las linguas en lur territori da tschep ed en il rest da la Svizra. Plinavant saja planisada ina retscha da novaziuns per la proxima perioda da promoziun: Ins vul far dapli per il talian ordaifer il Tessin ed il Grischun talian ed examinar mesiras per il rumantsch ordaifer ses territori da tschep.

«Il cussegl federal è pertschart che la promoziun ed il mantegniment da las linguas minoritaras dal talian e dal rumantsch è cumbinà cun tschertas sfidas.» Per la perioda dal 2017 fin il 2020 veglia la confederaziun analisar la situaziun cun ils chantuns pertutgads ed adattar las mesiras sch'i fa da basegn. «Jau na sun betg satisfatga da questa resposta», di Semade-

ni a l'anr. Il monitoring en connex cun la Charta europeica da las linguas cumpiglia numnadamain sulet las activitads da la confederaziun e dal chantun en connex cun la promoziun. Ina vaira analisa co ch'i stettia propi cun las duas linguas – ordaifer ils uffizis e l'administraziun – n'existia betg ed i dovria ina bilantscha da l'effect da las mesiras dals ultims onns.

La bilantscha duai mussar ils puncts flaivels e fermes da la promoziun, explitgescha Semadeni. Sin basa da questa bilantscha vesian ins ils basegns e possia adattar las mesiras. La cussegliera naziunala grischuna vul perquai batter vinvant per il rapport. Il cussegl naziunal tracta la fatschenta en ina da las proximas sessiuns. Passa sessanta parlamentararis han sutscrit il postulat il december passà.